



Broj: 12-08-5-1053-1/2022
Sarajevo, 14.03.2022. godine

Svi predsjednici općinskih/osnovnih sudova
Svi predsjednici kantonalnih/okružnih sudova
Svi predsjednici okružnih privrednih sudova
Predsjednik Višeg privrednog suda u Banjoj Luci
Predsjednik Osnovnog suda Brčko Distrikta BiH
Predsjednik Apelacionog suda Brčko Distrikta BiH

Predmet: Provođenje „Sedmica sudske nagodbe“ u sudovima u BiH

Poštovani,

Strategija za reformu sektora pravde u Bosni i Hercegovini je unapređenje sistema alternativnog rješavanja sporova (ARS) definisala kao jedan od strateških programa razvoja. Takođe, Visoko sudsko i tužilačko vijeće BiH (VSTV BiH, Vijeće) je svoje strateško opredjeljenje za unapređenje sistema alternativnog rješavanja sporova iskazalo kroz inicijativu za izradu Strategije za alternativno rješavanje sporova, koja je okupila resorna ministarstva, pružaoce usluga ARS, te predstavnike sudijske zajednice.

Iako suštinski ne predstavlja alternativu sudskom odlučivanju, sva nastojanja Vijeća za unapređenjem sistema ARS uključuju i sudsku nagodbu, kako zbog njenog značaja u pravnoj tradiciji BiH, tako i zbog činjenice da se metode postizanja sudske nagodbe u najvećoj mjeri podudaraju sa metodama koje se koriste u mirnom rješavanju sporova van suda.

Upravo zato, kao dio sistemskog nastojanja da se podigne svijest javnosti o prednostima zaključenja sudske nagodbe, ali i nastojanja da se inicira aktivnija uloga pravosudne zajednice u BiH u pogledu šire upotrebe ovog parničnog instituta, VSTV BiH od 2016. godine organizuje „Sedmice sudske nagodbe“.

S tim u vezi, obavještavamo vas da će se, devete po redu, „Sedmice sudske nagodbe“ **realizovati u periodu od 23. maja do 03. juna 2022. godine.**

Kao i do sada, sudovi imaju obavezu da u navedenom periodu zakažu ročišta u što većem broju predmeta u kojima postoji mogućnost sklapanja sudske nagodbe, te da se stranke podstaknu na rješavanje predmeta na ovaj način.

Na ovom mjestu podsjećamo na odredbe procesnih zakona koji regulišu parničnu materiju koja se odnosi na **imperativnost nastojanja suda da**, na način koji ne ugrožava njegovu nepristrasnost, na pripremnom ročištu, kao i u toku cijelog postupka, **stranke zaključe sudsku nagodbu.**

Dosadašnjom analizom nastojanja sudova tokom realizacije ove aktivnosti, uočeno je da određeni sudovi ulažu značajne napore i ostvaruju nadprosječne rezultate, dok kod drugih sudova izostaje adekvatan angažman. U tom smislu je ilustrativan podatak da u ukupnom broju predmeta riješenih sudskom nagodbom u periodu od 2015. do 2021. godine, zbirni rezultat samo dva suda (Osnovnog suda u Banjoj Luci i Općinskog suda u Tuzli) predstavlja tek nešto manje od trećine svih zaključenih sudskih nagodbi. Koliko god ovaj podatak bio pohvalan u smislu angažmana navedenih sudova, indikativan je u pogledu nepostojanja inicijative i aktivne uloge sudskog menadžmenta i postupajućih sudija u većini sudova u BiH.

Upravo zato, prilikom analize rezultata aktivnosti „Sedmica sudske nagodbe“, posebna pažnja će se posvetiti sudovima koji u prethodnom periodu nisu ostvarivali zadovoljavajuće rezultate, a rezultati ove aktivnosti i nastojanje pojedinih sudova će biti objavljeni javnosti.

U skladu sa navedenim, pozivamo predsjednike sudova da aktivno pristupe pripremi i organizaciji ove aktivnosti, te da izrade i provedu plan realizacije „Sedmica sudske nagodbe“, koji može uključivati i ne treba biti ograničen na: 1) održavanje sjednica nadležnih sudskih odjeljenja i/ili kolegija predsjednika suda, s ciljem planiranja aktivnosti i razmatranja pitanja i dilema u pogledu uloge sudije u nastojanju da stranke zakluče sudske nagodbe; 2) obavještenje sudija i stručnih saradnika o potrebi identifikacije predmeta u kojima će se, tokom navedenog perioda, zakazati pripremno ročište/ročište za glavnu raspravu; 3) zakazivanje ročišta i naglašavanje mogućnosti zaključenja sudske nagodbe i prednosti sudske nagodbe za stranke u postupku; 4) komuniciranje sa medijima (putem saopštenja za javnost, press konferencije ili TV/radio/novinskog intervjua) informacije o održavanju sedmica sudske nagodbe i prednosti sudske nagodbe za stranke; 5) objavljivanje informacije o održavanju sedmica sudske nagodbe, kao i promotivnih materijala izrađenih od strane VSTV-a BiH, na Internet stranicama sudova; 6) iniciranje pitanja zaključivanja sudskih nagodbi prema komunalnim preduzećima i lokalnim samoupravama u predmetima u kojima postoji jasna sudska praksa i visok stepen izvjesnosti u pogledu ishoda spora.

U tom smislu, s ciljem uniformisanja prakse planiranja i izvještavanja o realizaciji aktivnosti sedmica sudske nagodbe, u prilogu ovog dopisa sudovima će biti dostavljen i obrazac Plana realizacije „Sedmica sudske nagodbe“ te obrazac Izvještaja o realizaciji aktivnosti „Sedmica sudske nagodbe“.

Predsjednici sudova su, stoga, do 16. maja 2022. godine, obavezni dostaviti popunjen obrazac Plana realizacije „Sedmica sudske nagodbe“, koji će uključivati i listu izdvojenih predmeta po kojima će postupati s ciljem sklapanja nagodbe u toku trajanja aktivnosti.

Kad su u pitanju sudovi koji po stvarnoj nadležnosti postupaju u privrednim sporovima, predsjednici istih se pozivaju da sa posebnom pažnjom pristupe realizaciji ove aktivnosti, s obzirom na činjenicu da značajan broj ovih predmeta ima visoku vrijednost spora, te kao takvi značajno utiču na ekonomske tokove u državi. Dužina trajanja privrednih predmeta se negativno reflektuje na poslovanje privrednih subjekata, te bi rješavanje sporova u što kraćem vremenskom roku korištenjem sudske nagodbe, kao alata za rješavanje sporova mirnim putem, doprinijelo stvaranju bolje poslovne klime.

U prilogu ovog dopisa, takođe, ponovo dostavljamo unificirani obrazac – „Obavijest za stranke“, čiji sadržaj je usvojila Stalna komisija za efikasnost i kvalitet sudova, koji je potrebno dostaviti strankama u predmetima koji se vode pred sudom.

Takođe, podsjećamo da je, u saradnji s Centrima za edukaciju sudija i tužilaca u FBiH i RS, osigurana kontinuirana obuka sudija na temu sudske nagodbe, koja je postala sastavni dio godišnjih programa rada Centara. Stoga, još jednom koristimo priliku da vas podsjetimo na važnost specijalizirane obuke s ciljem unapređenja znanja i vještina sudija kada je u pitanju mirno rješavanje sporova.

Pored toga, VSTV BiH će u narednom periodu svim sudovima dostaviti i posebnu publikaciju, kao zbornik stručnih radova na temu sudske nagodbe u pravnom sistemu BiH, kao i video materijale koje sudovi mogu koristiti u promotivne svrhe. Pored toga, nastojaćemo da, do datuma održavanja prvih ovogodišnjih sedmica sudske nagodbe, osiguramo i dodatni broj ranije dostavljenih promotivnih materijala, a VSTV BiH će osigurati i širu medijsku kampanju u ovom pogledu, kako bi se javnost animirala za ovo pitanje.

S očekivanjem da će aktivnost „Sedmice sudske nagodbe“ ove godine zabilježiti bolje rezultate, srdačno Vas pozdravljam.

S poštovanjem,

Dostavljeno:

- Naslovu;
- a/a

